

CEANN AN AONAIÐ UM BAINISTÍOCHT, UIRLISÍ AGUS SCAIPEADH TIONSCADAL FÓGRA FOLÚNTAIS

Gníomhairí sealadacha - Feidhmghrúpa AD, grád 9

An bhfuil tú réidh don chéad dúshlán mór eile?

Tá Ceann á lorg ag an bhForas Eorpach Oiliúna (ETF) dá Aonad um Bainistíocht, Uirlisí agus Scaipeadh Tionscadal (PMU) chun foireann chumasach, rannpháirteach agus ildisciplíneach a stiúradh agus a chomhordú.

Mar bhaill d'Fhoireann Bainistíochta ETF, beidh tú ag obair i gcomhar le comhbhainisteoirí chun tacú le forbairt straitéiseach na gníomhaireachta, lena rialachas agus lena cumarsáid.

Más spéis leat tionscadal an AE, má tá tú díograiseach faoin oideachas, fostaíocht agus forbairt; má tá fonn ort foirne ardfeidhmíochta a stiúradh agus má tá tú ábalta oibriú i gcomhar le daoine eile, a bheith i mbun cumarsáide agus a bheith cuiditheach agus leathanaigeanta, gheobhaidh tú deis in ETF tú féin a chur in iúl go hiomlán i dtimpeallacht spreagúil, ilchultúrtha, dhinimiciúil agus ghairmiúil.

Céard é an ETF?

Tá an ETF ina gníomhaireacht AE atá lonnaithe in Turin, an Iodáil. Cabhraíonn ETF le tíortha atá i mbun trasdula agus le tíortha i mbéal forbartha leas a bhaint as acmhainneacht a gcaipitil dhaonna trí athchóiriú a dhéanamh ar chórais oideachais, oiliúna agus mhargadh an tsaothair, i gcomhthéacs bheartais chaidreamh seachtrach an Aontais Eorpaigh.

Tacaímid le tíortha a bhfuil teorainn acu leis an Aontas Eorpach chun feabhas a chur ar a gcórais ghairmoideachais agus ghairmoiliúna, chun anailís a dhéanamh ar riachtanais scileanna agus chun a margaí saothair a fhorbairt. Tríd an méid sin a dhéanamh, cabhraímid leo comhtháthú sóisialta a fheabhsú agus fás geilleagrach níos inbhuanaithe a bhaint amach, a théann chun tairbhe na mBallstát agus a gcuid saoránach trí chaidreamh eacnamaíoch a fheabhsú.

An tAonad agus a shainordú

Is cuid den Roinn Beartais agus For-rochtana Poiblí é an tAonad um Bainistíocht, Uirlisí agus Scaipeadh Tionscadal.

Is é croí-shainordú an Aonaid a áirithiú go ndéantar na tionscadail oibríochtúla go léir a chur i bhfeidhm go comhtháite agus go héifeachtúil agus go ndéantar acmhainní a leithdháileadh sa Roinn

Beartais agus For-rochtana Poiblí agus sa Roinn Mol Eolais araon, ag baint úsáide as eolas agus dea-chleachtas ó ghníomhaithe forbartha AE agus idirnáisiúnta araon.

Maoinítear tionscadail oibríochtúla ó bhuiséad ETF. D'fhéadfaí tionscadail eile a chur leis an gclár oibre agus a mhaoiniú ó fhoinsí eile.

Tá an tAonad freagrach as na nithe seo a leanas:

- cur chuige agus modheolaíocht ETF a shainiú agus a chur i bhfeidhm maidir le bainistiú tionscadal sofhreagrúil trí phróisis agus nósanna imeachta a bhunú agus a fheabhsú
- tionscadail a bhainistiú ó phleanáil go cur chun feidhme, faireachán agus tuairisciú
- acmhainní airgeadais a bhainistiú
- cáilíocht agus seachadadh gníomhaíochtaí tionscadail a bhainistiú - amhail imeachtaí, ceardlanna, comhdhálacha, aistriúcháin, eagarthóireacht ar dhoiciméid
- conarthaí le soláthraithe seachtracha a bhainistiú
- táirgí insoláthartha an tionscadail a scaipeadh
- cáilíocht na dtáirgí cumarsáide a bhaineann le tionscadail a áirithiú
- rannchuidiú leis na ranna oibríochtúla agus leis an timthriall institiúideach clársceidealaithe, pleanála agus faireacháin
- rannchuidiú le gníomhaíochtaí cumarsáide ETF, go himheánach agus go seachtrach araon.

Próifíl an phoist: príomhchuntasacht agus cúraimí

Oibreoidh Ceann an Aonaid go dlúth le baill foirne agus le comhbhainisteoirí. Forbróidh sé/sí caidreamh táirgiúil agus comhoibritheach ar fud na gníomhaireachta. Is cumarsáidí éifeachtach é/í, cuireann sé/sí luachanna na gníomhaireachta chun cinn agus feidhmíonn sé/sí mar eiseamláir. Tá sé/sí leathanaigeanta agus tairbheach. Tá sé/sí an-eagraithe agus tarmligeann sé/sí cúraimí go héifeachtach.

Déanfaidh Ceann an Aonaid an méid seo a leanas:

1 i réimse na bainistíochta gnó:

- oibriú i bhfoireann le comhbhainisteoirí chun cur le rialachas ETF
- straitéis a fhorbairt don aonad agus ar an gcaoi sin cur le forbairt na gníomhaireachta
- dul chun cinn a phleanáil agus obair leantach a dhéanamh ina leith, rioscaí a mheasúnú agus athrú a thabhairt isteach i gcomhréir le cuspóirí
- measúnú a dhéanamh ar na hacmhainní is gá ábharthach, daonna agus airgeadais agus iad a bhainistiú go héifeachtach
- cinntí a dhéanamh, iad a chur in iúl agus a chur i bhfeidhm
- rannchuidiú le díospóireachtaí i gcruinnithe (bainistíochta, aonaid nó foirne) agus smaointe nuálacha agus úrnua a chur ar aghaidh

2 i réimse na bainistíochta daoine:

- rannpháirtíocht agus cuspóir coiteann a chothú timpeall spriocanna misin agus aonaid na gníomhaireachta
- a bhfoirne ildisciplíneacha a spreagadh agus a threorú i dtreo spriocanna na n-aonad agus a ngníomhaíochtaí a chomhordú
- foireann láidir a thógáil a bhfuil láidreachtaí comhlántacha aici

- forbairt foirne a chothú trí aiseolas, cumhachtú, traenáil agus deiseanna foghlama a chur ar fáil

3 i réimse na cumarsáide:

- cur leis an gcumarsáid inmheánach chun trédhearcacht agus rannpháirtíocht foirne a fheabhsú
- rannchuidiú go gníomhach i ngníomhaíochtaí cumarsáide ETF

Táthar ag súil go mbeidh Ceann an Aonaid PMU ag taisteal roinnt uaireanta sa bhliain.

Critéir Incháilitheachta

D'fhonn a bheith incháilithe, ní mór duit na riachtanais seo a leanas a shásamh ar an dáta deiridh a nglacfar le hiarratais:

- 1 A bheith i do náisiúnach de cheann de Bhallstáit den Aontas Eorpach
- 2 Cearta iomlána mar shaoránach a bheith agat
- 3 Aon oibleagáidí arna bhforchur ag an dlí a bhaineann le seirbhís mhíleata a bheith comhlíonta agat
- 4 A bheith corpacmhainneach chun na dualgais a bhaineann leis an bpost a chomhlíonadh
- 5 Leibhéal oideachais arb ionann é agus ceithre bliana ar a laghad de staidéar ollscoile críochnaithe arna fhiánu le dioplóma a bheith agat, agus taithí ghairmiúil chuí dhá bhliain déag ar a laghad a gnóthaíodh ina dhiaidh sin

nó

Leibhéal oideachais arb ionann é agus trí bliana ar a laghad de staidéar ollscoile críochnaithe arna fhiánu le dioplóma a bheith agat, agus taithí ghairmiúil chuí trí bliana déag ar a laghad a gnóthaíodh ina dhiaidh sin.

Ní fhéadfar ach dioplómaí a bronnadh i mBallstáit AE nó lena mbaineann teastais chomhionannais arna n-eisiúint ag údaráis sna Ballstáit sin a bhreithniú.

- 6 Eolas críochnúil (leibhéal C1 i ngach gné den Chomhchreat Tagartha na hEorpa um Theangacha (CEFRL)) i gceann de theangacha an Aontais agus eolas sásúil (leibhéal B2 i ngach gné de réir CEFRL) i dteanga eile de chuid an Aontais, a mhéid is gá chun na dualgais a chomhlíonadh.

Critéir Roghnúcháin

Ba cheart go mbeadh na nithe seo a leanas ag iarrthóirí:

Taithí ghairmiúil

- Taithí ghairmiúil chuí 12 bhliain de réir na tuairisce ar chroí-shainordú agus ar fhreagrachtaí an aonaid
- Mar chuid den 12 bhliain de thaithí chuí: 5 bliana taithí i gceannas ar fhoireann.

Scileanna teicniúla an-mhaith agus eolas ar

- Bainistíocht tionscadal
- Institiúidí an AE agus cinnteoireacht

- Comhpháirtíochtaí, comhphleanáil agus tionscadail
- Béarla: leibhéal C1 i ngach gné de réir CEFRL

Scileanna ceannaireachta agus bainistíochta an-mhaith i

- Smaointeoireacht straitéiseach agus treo a leagan síos, go háirithe sna réimsí seo a leanas:
 - straitéisí corparáideacha a aistriú go cuspóirí don aonad
 - obair an aonaid a eagrú agus a bhainistiú
- Bainistíocht dhaoine, go háirithe:
 - foireann ardfheidhmíochta a threorú agus a fhorbairt
 - baill foirne a spreagadh agus a fhorbairt

Scileanna boga an-mhaith i

- Féineagrú, bainistíocht ama agus tarmligean
- Cumarsáid ó bhéal agus i scríbhinn chomh maith le hidirbheartaíocht
- Caidreamh comhoibritheach agus líonrú a chothú
- Meon oscailte agus béim ar fhorbairt

Buanna

- Dea-thuiscint ar ionstraimí agus módúlachtaí maoinithe AE
- Dea-thuiscint ar rialacha airgeadais agus soláthair AE
- Dea-thuiscint ar fhorbairt chaipitil dhaonna
- Taithí ar obair i gcaidreamh seachtrach agus / nó i gcomhar forbartha idimáisiúnta

Iarratais a chur isteach

Is é an dáta deiridh chun iarratais a chur isteach ná 9 Meán Fómhair 2021 ag 23.59 (am Torino).

Tugtar cuireadh duit d'iarratais a sheoladh trí shuíomh gréasáin ETF, faoin roghbhliár "About" agus ansin faoi "Recruitment".

Moltar go mór duit gan fanacht go dtí an lá deiridh chun d'iarratas a chur isteach mar go bhféadfadh trácht trom idirlín nó fabht sa nasc idirlín a bheith ina gcúis le deacrachtaí nuair a bheifear ag cur iarratais isteach. Ní féidir glacadh leis go bhfuil ETF freagrach as aon mhoill ar d'iarratas mar gheall ar dheacrachtaí den sórt sin.

Ceanglais fhoirmiúla

Ní mór duit na doiciméid go léir a luaitear thíos a chur ar fáil, faoin dáta deiridh, i mBéarla go hinmhianaithe:

- litir chumhdaigh uasmhéid aon leathanaigh, ag míniú cén fáth a bhfuil spéis agat sa phost
- curriculum vitae san fhormaid CV Europass

Tabhair faoi deara nach nglacfar ach le hiarratais a cuireadh isteach ar líne trí shuíomh gréasáin ETF, i gcomhréir leis na ceanglais fhoirmiúla a luaitear thuas.

Roghnúchán

Tá trí chéim i gceist sa chéim roghnúcháin:

Céim 1 – Iarratais a scagadh

1.1 Incháilitheacht

Déanfaidh an fhoireann Earcaíochta athbhreithniú ar na hiarratais go léir. Ní théann ach na hiarratais a chomhlíonann na critéir incháilitheachta agus na ceanglais fhoirmiúla ar fad ar aghaidh go dtí an chéad chéim eile.

1.2 Measúnú ar iarratais

Bunaithe ar an eolas a chuirtear ar fáil sa curriculum vitae, déanfaidh an bord na hiarratais a mheas i gcomparáid le taithí ghairmiúil, scileanna ceannaireachta agus bainistíochta, chomh maith le scileanna agus sócmhainní teicniúla.

Is iad na hiarrthóirí a chuirfidh na hiarratais isteach is mó a bheidh i gcomhréir leis an bpost a chuirfear ar an ngearrliosta. Táthar ag súil go mbeidh thart ar 6 iarrthóirí ar an ngearrliosta.

Tá ETF ag súil le líon mór iarratas. Mar thoradh air sin, ní rachaidh an fhoireann earcaíochta i dteagmháil ach le hiarrthóirí atá ar an ngearrliosta. Táthar ag súil go mbunófar an gearrliosta i mí Mheán Fómhair 2021.

Céim 2 – Ionaid mheasúnaithe, agallaimh agus trialacha scríofa

Tabharfar cuireadh do na hiarrthóirí gearrliostaithe páirt a ghlacadh in ionad measúnaithe, in agallamh agus i dtrial scríofa.

Déanfaidh an t-ionad measúnaithe cumas na n-iarrthóirí a mheas, agus díreofar ar roinnt dá scileanna ceannaireachta agus bainistíochta agus scileanna boga.

Na hiarrthóirí a ghlac páirt in ionad measúnaithe den chineál sin laistigh de thréimhse dhá bhliain (dar críoch an sprioc-am le hiarratas a dhéanamh), ní bhfaighidh siad cuireadh chun freastal ar ionad measúnaithe eile – ach amháin más rud é gur tharla an t-ionad measúnaithe sna chéad 6 mhí den thréimhse 2 bliana sin agus má iarrann an t-iarrthóir amhlaidh.

Déanfaidh an bord measúnú ar thaithí ghairmiúil agus ar scileanna na n-iarrthóirí atá riachtanach don phost agus do Ghníomhairí Sealadacha AE trí agallamh agus trialacha scríofa. Déanfar meastóireacht gan ainm ar chuid amháin den triail ar a laghad.

Is i mBéarla go príomha a reáchtálfar an próiseas roghnúcháin (ionaid mheasúnaithe, agallaimh, agus trialacha scríofa).

Táthar ag súil go reáchtálfar céim a dó i mí Dheireadh Fómhair 2021.

Is go cianda a dhéanfar an t-ionad measúnaithe, an t-agallamh agus an triail scríofa.

Ar chríochnú na céime seo, déanfaidh an bord liosta de na hiarrthóirí is mó a mheastar atá i gcomhréir leis an bpost - iarrthóirí a bhain na torthaí seo a leanas amach, ar a laghad:

- 70% de na pointí leithdháilte le haghaidh scileanna ceannaireachta agus bainistíochta
- 70% de na pointí leithdháilte le haghaidh scileanna boga a ghnóthú, agus

- 70% de na pointí leithdháilte le haghaidh scileanna teicniúla agus taithí ghairmiúil ábhartha a ghnóthú

Céim 3 – Ceapachán

Ceapfaidh an Stiúrthóir an t-iarrthóir rathúil.

Táthar ag súil go rachaidh an t-iarrthóir a n-éireoidh leis/léi i mbun dualgas ar an 1 Feabhra 2022.

Féadfaidh an Stiúrthóir cinneadh a dhéanamh freisin liosta d'iarrthóirí eile a d'fhéadfadh a bheith oiriúnach a bhunú. Beidh an liosta bailí go dtí an 31 Nollaig 2022. Féadfar an tréimhse bhailíochta sin a fhadú le cinneadh ón Stiúrthóir. Ní ráthaíonn cuimsiú ar an liosta tairiscint ar phost.

Sa chás go dtagann folúntas i bpost den sórt sin aníos nó gur gá é a chlúdach, féadfaidh an Stiúrthóir post a thairiscint d'iarrthóir ar an liosta a n-oireann a p(h)róifíl is fearr do riachtanais ETF um an dtaca sin.

Obair an bhoird

Tá obair agus plé an bhoird faoi rún daingean agus ní cheadaítear aon teagmháil lena chomhaltaí. Is éard atá i gceist le teagmháil a dhéanamh leo go ndícháileofar tú ón nós imeachta.

Coinníollacha conartha

Conradh fostaíochta

Maireann an conradh fostaíochta trí bliana agus is féidir é a athnuachan.

Tá sé faoi réir tréimhse phromhaidh naoi mí.

Tá conarthaí na ngníomhairí sealadacha i gcomhréir le hAirteagal 2(f) de Choinníollacha Fostaíochta Sheirbhísigh Eile (CEOS) an Aontais Eorpaigh.

Má tá conradh do ghníomhaire Sealadach 2(f) ag an iarrthóir a n-éireoidh leis/léi faoi láthair agus má cháilíonn sé/sí d'aistriú faoi théarmaí CEOS, beidh an bandaleithead don phost seo ar féidir freastal air i gcomhréir le hlarscríbhinn I de na Rialacháin Foirne.

Faoin chineál conartha sin, tá an fostaí faoi cheangal CEOS agus na Rialacha Cur Chun Feidhme cuí.

Ní bheidh ETF faoi cheangal leis an gconradh fostaíochta arna thairiscint ach amháin sa chás go mbeidh na nithe a leanas déanta ag an iarrthóir a roghnófar sula síneofar an conradh:

- cóipeanna bunaidh nó cóipeanna deimhnithe a bheith curtha ar fáil aige nó aici de gach doiciméad ábhartha lena ndeimhnítear a (h)incháilitheacht, lena n-áirítear taifead ciontuíthe glan
- scrúdú dochtúra éigeantach a bheith déanta aige nó aici lena ndearbhaítear go gcomhlíonann sé nó sí an caighdeán corpacmhainneachta is gá chun na dualgais lena mbaineann a chomhlíonadh
- ETF a bheith curtha ar an eolas aige nó aici faoi aon choinbhleacht leasa atá ann nó a d'fhéadfadh a bheith ann agus gur measadh nach bhfuil aon leas pearsanta aige ná aici a chuirfeadh as dá neamhspleáchas, ná aon choinbhleacht leasa eile.

Tuarastal agus sochair

Ag brath ar a staid phearsanta, d'fhéadfadh baill foirne a bheith i dteideal liúntas éagsúil amhail liúntas easaoránachta, liúntas teaghlaigh, liúntas linbh chleithiúnaigh, liúntas oideachais, etc. Tá an tuarastal

faoi réir cánach Comhphobail a asbhaintear ag an bhfoinse agus tá comhaltaí foirne díolmhaithe ó chánachas náisiúnta.

Gnáth-thuarastal do: fostaí aonair AD 9, a bhfuil 12 bhliain de thaithí ghairmiúil ábhartha acu agus liúntas bainistíochta: thart ar EUR 5 800 glan sa mhí – nó fostaí a bhfuil 12 bhliain de thaithí ghairmiúil ábhartha acu, liúntais bhainistíochta agus easaoránachta agus 1 leanbh cleithiúnach: thart ar EUR 8 200 glan sa mhí.

Áit fostaíochta

Is é Turin, an Iodáil, an áit fostaíochta.

Faisnéis bhreise

Ní thabharfar na doiciméid a chuirtear ar fáil le linn an nós imeachta ar ais d'iarrthóirí. Ina ionad sin, coinneofar ar comhad iad in ETF don tréimhse is gá le haghaidh an phróisis agus scriosfar ina dhiaidh sin iad.

Beidh feidhm ag reachtaíocht an Aontais Eorpaigh um chosaint sonraí pearsanta agus rúndacht faisnéise maidir leis na sonraí pearsanta ar fad a bhailítear le haghaidh an phróisis seo.

Tá tuilleadh faisnéise le fáil sa Ráiteas príobháideachais ar shuíomh gréasáin ETF.

Iarratasóirí a mheasann go ndearnadh dochar dá leasanna le cinneadh a bhaineann leis an nós imeachta roghnúcháin, féadfaidh siad gearán a dhéanamh trí na treoracha (i mBéarla) atá ar fáil ar láithreán gréasáin ETF a leanúint.

NÓTAÍ: Má tá neamhréireachtaí ann idir na leaganacha teangeolaíoch difriúla, ba cheart glacadh leis gurb é an leagan Béarla an leagan ceart.